

Efesus Kimbi

Polnön Efesus yengöra Kimbi alök.

Jim-asa-asari keu

Polnön Rom sitigö kösö mire tata Efesus urumelej kambu yengöra Kimbi ki ohoyök. Efesus mi Eisia prowinsgö siti bohonji. Siti mianggö uruje kölköl-örörö gwötpuk ahömalget. Polnön misin nup memba liliköi indimji karöbut ahiga Efesus kaba yambu karöbut mianggören Buja keu jiba malök. Efesus sitinöy Juda ambazip tosatji miri toji yengö sutjine malgerangöra Polnön kimbi ki ohoba kewö kusum engiyök, “Kraistnön lök kambu yahöt toroqeiga urumelej kambu mohok-kun akzahot.” (2.15-16),(3.6) Anutunön jitsihitji aka kalem möriamji urumelej kambu nengöra denöwö ali ahözawi, mi gwötpuk jim asariza. (3.10) Mianggö dopkeu karöbut kewö jiyök:

1. Urumelej könagesö enön sile sep busu mohot aketka Kraistnön nanjak nöropjini akza. (1.23; 4.15-16)

2. Urumelej könagesö enön miri mohot tandök aketka Kraistnön engö tandöjini kömbönañi akza. (2.21-22)

3. Urumelej könagesö enön ambi buja ewö aketka Kraistnön apñangö tandök akza. (5.25-27) Mewöyök Kraistnön Efesus engö kambu yahöt toroqem etkiiga mianggöra sile sep busu mohot akze. Asakñangö ambazip akerangöra malmalñinañgö goro keuji keuji ohoyök. Mewö.

Buk kianggö bahöñi bohonji 4 mi kewö:

Keu mutukji keu 1.1-2

Kraist aka urumelej könagesö 1.3–3.21

Kraistpuk malmal dölökñi 4.1–6.20

Kimbigö keu kötji bohonji 6.21-24

1 ¹ Anutunöŋ Pol ni jitsihitŋaŋgö dop melaim niŋgiiga Kraist Jisösgö aposol akzal. Mötnariŋ alaurup sarakŋi Kraist Jisösbuk qekötahöba Efesus sitinöŋ maljei, nöŋön embuk keu eraum mötŋingöra kimbi ki ohozal.

² Anutu Iwinini aka Kembu Jisös Kraist yetköŋ mönö kalem möriam enġiyohotka luainöŋ malme.

Kraistnöŋ Anutugö kötümötuetŋi neŋgimakza.

³ Neŋön Kembunini Jisös Kraistkö Iwi Anutuŋi möpöseimakin. Yaŋön nini Kraistpuk qekötahöinga uruninan ölöwakaŋpaköra Suep mirigö kötümötuetŋi aka kalemŋi könäŋi könäŋi mi urunine alöha kayambu asuhui mala kotket. ⁴ Anutunöŋ nini mutuk möpŋaŋgö möpŋeyök kewö akingöra möwölöhöm neŋgiyök: Kraistnöŋ nam köŋ neŋgiiga neŋön yaŋgö buŋaŋi sarakŋi aka Anutugö jemesoholŋe keunini qahö kinbin. Mewö möwölöhöm neŋgiba miaŋgö andöŋe Suep gölme miwikŋaiba al etkiyök. Nalö miaŋgöreŋök könahiba ambazip jöpaköm neŋgiba mala korök.

⁵ Jöpaköm neŋgiba urusihimŋaŋgö dop qeljiŋe keu jit areŋi ala keunini kewö jim teköyök: Jisös Kraistnöŋ nam köŋ neŋgiiga Anutunöŋ neŋgömeiga nanŋi nahönböraturuŋi akin. ⁶ Wölböt Nahönŋi neŋgöra melaiiga eta Anutugö kalem möriamŋaŋgö kukösumŋi buŋabuŋaŋambuk köleŋda söŋgöronŋi qahö öne neŋgiyök. Nini mönö kalem möriamŋi miaŋgöra Anutu möpöseim waŋgimakin. ⁷ Anutugö kalem möriamŋaŋgö köweŋi mi keta bölöknŋi. Miaŋgö dop Jisösnöŋ seŋŋi mokoba miaŋön sohohnini meyök. Mi meyöhaŋgöra Anutunöŋ ölöŋ siŋgisöndoknini mosöta saŋoŋ neŋgimakza.

⁸ Yaŋön kalem möriamŋi mi köweŋeyök keleŋmaleleŋ mokoiga qaknine öŋgöyök. Mötkutukutuŋi öŋgöŋgöŋi pakpak miaŋgö dop kewö möt asarim neŋgiyök: ⁹ Anutunöŋ mutuk nanŋi uruŋe keu areŋ jöhöba möri ölöwahiga tölapŋe ahöi öne mala kotketmö, Kraistnöŋ Anutugö keu jitŋaŋgö dop wuatangöba eta neŋgöreŋ indeliga eka mörin. ¹⁰ Anutunöŋ mutuhök kalem möriam areŋaŋgö könäŋi kewö mötmöriyök, “Anutu nöŋön areŋ mi wuatangöba mala malbiga nalöŋi törörök kam kuŋguiga miaŋgöreŋ öŋambuk aiga kewö asuhuma: Körek Suep mirigö jakeŋi jakeŋi miaŋgöreŋ me gölmenöŋ ahuba maljei, nöŋön mönö mi pakpak mindiriba jöhöm enġimam aka Kraist kuŋgum waŋgibiga körek yeŋgö bohönŋini mohot aka malma.”

¹¹ Anutunöŋ mutuhök nanŋi uruŋaŋgö dop keu jöhöi ahözawi, mönö areŋ miaŋgö dop kuŋgukuŋgu keuŋi jiiga yuai pakpak asuhumakza. Nanŋi areŋi miaŋgö dop qeljiŋe Juda könagesö nini nanŋi buŋaŋi aka malbingöra jim teköba al neŋgiyök. Miaŋgö dop nini tosatŋan Kraistpuk qekötahöinga

^a 1.1 Apo 18.19-21; 19.1 ^b 1.7 Kol 1.14

meköm neŋgiiga buŋaŋi börösamot ewö aŋgön köla memba maljin. ¹² Juda könagesö neŋön Kraistnön galöm köl neŋgimapkö mamböta qeljiŋe jörömqöröm ak waŋgiba mala korini, yaŋön nini Anutugö kukösumŋi buŋabuŋaŋambuk möpöseiba malbingöra aka möwölöhöm neŋgiyök.

¹³ Kian kantri eŋgöreŋök tosatŋan mewöyök Kraistpuk toroqeba qekötahöget. Amötqeqegö Ölöwak Buŋaŋi jigetka keu ölni mi möta uruŋini melenget. Uŋa Töröŋi yaŋön Anutu buŋaŋaŋgö muŋgem aiwesökŋi akza. Uŋa mi melaii etmapkö keu jöhöyöhi, yaŋön mönö mi uruŋine ali geyök. Kraist möt narim waŋgigetka Anutunön aiwesökŋi kömbönaŋi mi mekötahöm eŋgiiga malje. ¹⁴ Anutunön könagesöuruŋi Suep Buŋa neŋgimamgö keu jöhöyöhi, mi membingö aiwesökŋi Uŋa Töröŋi mi mutuk al neŋgiyök. Uŋa Töröŋi urunine ali maljawangöra mönö kewö möt köhöizin: Anutunön lök sohohnini memba buŋauruŋi ahinga biaŋ gölmenöhök neŋguaŋgiriga Suepnön öŋgöba oyaeŋkoyaeŋ akin. Miangöra mönö Anutugö kukösumŋi buŋabuŋaŋambuk möpöseimakin. Mewö.

Polnön Anutu möpöseiba kewö köuluköyök:

¹⁵ Mewö oyaeŋkoyaeŋ akingöra aka nöŋön Efesus eŋgöra köulukömakzal. Eŋön Kembu Jisös pöndaŋ möt nariba ambazip sarakŋi pakpak uruŋinan jöpaköm eŋgimakzei, tosatŋan miangö buzup keuŋi jigetka möral. ¹⁶ Miangöra buzup keu mi mörali, nöŋön mewöyök eŋgöra aka Anutu möpöseiba mala qahö mosöral. Qahö. Nöŋön köuluköba miangöreŋ mötmörim eŋgimakzal.

¹⁷ Mötmörim eŋgiba Kembunini Jisös Kraistkö Anutuŋi mi kewö köuluköm waŋgimakzal, “O Iwi kukösum Toŋi, gi mönö Uŋagi Töröŋi Efesus alaurup eŋgiman. Uŋa mi uruŋine alnöŋga mötkutukutuŋini qainŋi kun asuhuiga Anutugö könaŋi ölöŋŋanök indeliga möt yaköme. ¹⁸ Anutu, gi mönö uru jeŋini mem asarinöŋga nangi Buŋagahö könaŋi möt yaköme.” Anutunön nanŋi ambazip sarakŋi neŋgöra Suep Buŋa kukösumŋi buŋabuŋaŋambuk mi neŋgimamgö keu jöhöiga iŋini yuai mi asuhumapkö al mamböta jörömqöröm akŋegöra eŋgoholök. Jörömqöröm aketka Jisösnön kunbuk asuhuiga aködamunŋinambuk akŋei, iŋini oyaeŋkoyaeŋ miangö könaŋi möt sölöŋgömegöra köulukömakzal.

¹⁹ Möt narim waŋgiinga Anutugö kukösum köhöikŋan urunine sehiba nup memakzawi, mianŋön mönö keta bölökŋi teteköŋi qahö akza. Iŋini miangö könaŋi möt kutumegöra köulukömakzal. Ösum-mumuŋi wewelipŋambuk mianŋön silenini kutuba inahöm neŋgimakzawi, Anutunön miangö kukŋi kewö kondel neŋgiyök:

²⁰ ^c Anutunön kukösumŋi nupnön ala Kraist mem gulim waŋgii kömupnöhök wahörök aka waŋgiriga Suep mire öŋgöba selŋi selŋi

^c 1.20 Sum 110.1

liliköba jakenji jakenji engonggiriga Anutunöj böröni öljne dum tatat mutukne ali tatza. ²¹Ali jakömbuak dumne tata öroyuai pakpakö bohonina kinja. Bem suahö galöm aka yengö nemböjine jembon pom aka gawman kiap öngöngöni eretji kukösumnjambuk kembu ak nehgim�akzei, Kraistnöj mönö mi körek pakpak galöm kölj engim�akza. Suep mire, gölmenöj aka mietkö sutnjire galöm qet pakpak qet engigetka bisizei, Kraistnöj mi körek engonggita öngöza. Gölmegö nalö kewöneyök qahöpmö, könangep nalö qainji kun asuhuiga mal öngöbini, miangörej mewöyök öroyuai pakpak galöm köla mal öngöma.

^{22 d e}Anutunöj uja, ömewöröme, ambazip aka öroyuai pakpak mi memba eta Kraistkö bapne al nehgii malinga Kembunini öngöngöni akza. Anutunöj Kraist mi urumelej könagesö nehgiba bohonini kinmapköra kuŋgum waŋgiiga malja. ²³Yaŋön kötal nehgiba bohonini aiga nejön yaŋgö öljŋaŋgö köna börö su-urupni akzin. Kraistnöj nörowök aiga qahö dop kölbawakmö, nejön yaŋgö törömunji aka toroqeinga öljŋan asuhum tiŋgiriga dop kölja. Kraistnöj mewöŋanök öroyuai pakpakö törömunjina kun aka toroqeiga körek pakpak miejön mönö Anutugö aködamunjinambuk asuhuba dop köla anakze. Mewö.

Köhömuŋeyök guliba Kraistpuk köhöiba maljin.

2 ^{1 f}Mutihök köna ongita ŋiŋgisöndokni ŋiŋgisöndokni akerangöra malmal köhömuŋi mala kotket. ²Ijini nalö miangörej gölmegö ahakmeme bölöni wuatangöget. Ömewöröme yengö Kembuŋinan nalö kewöje Suep gölme sutnjire mala qegetal ambazip uruŋini sölölohöba galöm kölj engim�akzawi, mönö yaŋgörej qekötahöba tem kölj waŋgiba malget.

³Nejön körek mewöŋanök mutuk yengö sutnjine silebile aka laŋ malin. Uru silegö sihim kömbönaŋnini bölöni wuatangöba nanine imbi- imbi malin. Mewö laŋ malinga Anutunöj neŋgehi qahö dop köliga irimsesewölŋi qaknine ali malin. Qegetal ambazip tosatni yengö dowök Anutugö irimsesewölŋaŋgö bujaya aka malin.

⁴Mewö malinmö, nalö kewöje mewö qahö. Anutunöj ak-kömukömunji teteköni qahö miaŋön mönö jöpaköm nehgiyök. ⁵Köna ongita Anutu qetala miangöra köhömuŋi aka malinmö, Anutunöj Kraist mem guliyöhi, nini mewöyök mönö mewöŋanök mem gulim nehgiiiga köhöiba maljin. Yaŋgö kalem möriamŋan mönö amöt qem engiiiga kunbuk letotket.

⁶Kraistnöj wahöröhi, nini mewöyök mönö mewöŋanök nehgömindiiiga köhömuŋeyök wahörin. Anutunöj Kraist Jisös waŋgiriga Suep mire öngöyöhi, nini mewöyök mönö mewöŋanök Suep malmalgö jake ahözei, mönö miangörej al nehgiiiga yambuk tosatni galöm kölj engiba maljin.

^d 1.22 Sum 8.6 ^e 1.22-23 Kol 1.18 ^f 2.1-5 Kol 2.13

⁷Anutunöŋ kewögöra mewö al neŋgiyök: Anutunöŋ kalem möriamŋaŋgö köwenj teteköŋi qahö miaŋön aukŋe asuhui möt asaribingöra mörök. Möt asariba könangep nalöŋi nalöŋi qainŋi kun asuhugetka teteköŋi qahö mal öŋgöbini, nalö miaŋgöreŋ mi neŋgim qarimapköra mörök. Anutunöŋ Kraist Jisös melaiiga kaba urukalemŋi mewö kondel neŋgiyök. ⁸Anutu möt narim waŋgigetka kalem möriamŋan mönö amöt qem eŋgiiga kunbuk letotket. Nanŋini nam köl aŋguba mewö miaŋön qahö letotketmö, Anutunöŋ mi kalemŋa ak eŋgiyök. ⁹Nanŋinak yuai kun ak sorokögeraŋgöra aka qahö letotket. Kunöŋ kun nanŋi silenj memba öŋgöbapüköra mönö kalem möriamŋaŋgörök aka mewö ak eŋgiyök.

¹⁰Nini Anutugö börösöwöya maljin. Kraist Jisösbuk qekötahöinga Anutunöŋ uru dölökŋi miwikŋaiba al neŋgiyök. Anutunöŋ qeljiŋe nup ölöŋŋi ölöŋŋi möwölöhöba mözözömgöyöhi, neŋön mi memba malbingöra mewö miwikŋaim neŋgiiga maljin. Mewö.

Kraistpuk qekötahöba öljŋi mohot akzin.

¹¹Miaŋgöra aka Efesus iŋini mutuk Juda ambazip qahö ahuba Anutugö könagesö qahö malgeri, mönö mi mötmöriba malme. Tosatŋan eŋgöra kewö jiba jim eŋgimalget, “Nini Anutugö aiwesökkinambuk maljinmö, kantri tosatŋi iŋini ambazip omaŋi aiwesökŋini qahö!” Qet mi azi börönöŋ aiwesök silenine yandimakzei, mönö mi mötmöriba jimalget. ¹²Iŋini nalö miaŋgöreŋ uruŋini Kraistpuk qahö jöhöba öne yaigep malget. Kian kantri iŋini Juda könagesö neŋgö kau likepurupnina malget. Anutunöŋ ambazip nanŋaŋgöra möwölöhöm neŋgi maljini, iŋini neŋgö sutnine qetŋini qahö malget. Anutunöŋ Buŋaŋi alaurupŋi eŋgimamgö jiba keu jöhöyöhi, iŋini mi qahöpmahöp möt kutuba tönpin malget. Oyaenköyaen akingö jörömqörömŋini qahö. Anutuŋini qahö tandök gölmenöŋ önewat laŋ malget. Mönö mia mötmöriba malme.

¹³Iŋini mutuk tikep malgetmö, Kraist Jisösbuk qekötahögetka sepŋan saŋgoŋ eŋgiiga nalö kewöŋe amqeba Anutugö kösutŋe kaba malje. ¹⁴Kraistnöŋ nanŋak luai Tonini akza. Yaŋön Juda könagesö aka kian kantri ambazip kambu yahöt nini mindirim neŋgiiga kutulangömakzin. Sutnine kerök ahöba sel paset köhöikŋi ewö mendeŋ neŋgiyöhi, yaŋön mönö soŋgo mi tumbaköba lulupniga urumelenj könagesö mohot akzin. ¹⁵*Jisösnöŋ nanŋi gölme silenŋan kömuiga mewö miaŋön Juda neŋgöreŋ Köna keu aka miaŋgö jöjöpäŋ keuŋi aka jimkutukutu tosatŋi mi köndeŋnök. Sile kambu yahöt mindirim neŋgiba könagesö dölökŋi mohot akingöra mi köndeŋnök. Miaŋgöra uru dölökŋi miwikŋaiba al neŋgiiga Kraistpuk qekötahöinga sutnine luai qei asuhum neŋgiyök.

* 2.15 Kol 2.14

¹⁶ ^hKraistnönj kömumba keröknini maripomnönj qem kömui erök. Sileñi mohot miañgö sepñjan mönö ambazip kambu yahöt nenguanñgiriga ölop liliñgöba Anutugö kösutñje kabin. Mewö mindirim neñgiiga ölop böröqeqe akin. Mi ak teköba Kraistkö ölnji mohot aka maljin. ¹⁷ ^hKraistnönj kaba luai asuhumapkö Buñañi mi kian kantri ambazip Anutu andö qeba tikep malgeri, engöra jim asarim engiyök aka Juda ambazip Anutugö kösutñje malini, mönö neñgöra mohot jim asarim neñgiba malök. ¹⁸ Kraistnönj Juda aka kian kantri ambazip nini körek nam köl neñgiiga Uña Törönji mohotñjan köna kondel neñgiiga ölop amqeba Iwigö jemesoholñje añgotpin.

¹⁹ Miañgöra iñini Juda ambazip qahöpmö, töndup kian ambazip qandakñji mi qahö toroqeba malje. Anutugö miri gölme toñi sarakñji aketka nembuk mohotñje Anutugö urumeleñ könagesö akzin.

²⁰ Kezapqetok ambazip yeñön mutuhök Anutugö keunönj tandö esim kuñgugetka Kraist Jisösnönj nanñak kaba tandö kömbönañnini aka aposol melaim neñgiba bohonini kiniga Anutugö urumeleñ jikeya akzin. Iñini mewöyök tandö miañgöreñ añgota nañgönañgö ak añguba köhököhöi miwikñaimakze. ²¹ Yañön mönö miri mi jömukñanök mindirim jöhöiga kinakza. Nini Kembubuk qekötahöba kinda kutulangöinga mötnaripninan köhöim qariiga Anutugö urumeleñ jike kömbukñji akzin. aka ²² Iñini mewöyök Kembugöreñ qekötahöba urumeleñ alaurup tosatñji yembuk kutulangöba mohotñje kinda uruñini nañgöm añguba köhököhöi miwikñaimakze. Mewö kinda Anutugö urumeleñ jike aketka Uña Törönji uruñine ala miañön nanñak jikeñi miañgö uruñje malja. Mewö.

Polnönj kian kantri yeñgöreñ anda Buña nup meyoök.

3 ¹ Könañi miañgöra aka Pol nönjön kian kantri ambazip iñini bauköm engimamgöra nup memba maljal. Mewö malbiga Kraist Jisösgö nupñi mealañgöra kösö mire al niñgigetka tata simin köla köulukömakzal. ² Anutunönj kalem möriamñi kantri tosatñji engöra mendeñ engiiga ölöwakñegö nup niñgiyöhi, iñini mi ölnja möt teköze. ³ Anutunönj keu areñi tölapñi indela jiiga möt yaközali, keu miañgö könañi lök töröpñanök ohom engial. ⁴ ^j Ohom engiali, iñini kulem mi oyoñda ölop nönjö könani kewö möt asarime: Nönjön Kraistkö könañi tölapñi mi ölopñanök möt kutuzal.

⁵ Möpñangö möpñeyök ambazipnönj könahiba mala kota malgeri, yeñön nalö miañgöreñ Buña tölapñi miañgöra tönpin malget. Mewö mala kotketmö, nalö kewöñje Uña Törönjan mi Anutugö aposol aka kezapqetok ambazip tök-kutukutuñi neñgöra jim indeli mötzin. ⁶ Buña tölapñi mi kewö: Kraist Jisösnönj Buña neñgimapkö jiba keu jöhöyöhi, iñini mi Juda

^h 2.16 Kol 1.20 ⁱ 2.17 Ais 57.19 ^j 3.4-6 Kol 1.26-27

nembuk örörönj anğön köla memba malje. Ölöwak Buñanönj miangö könani mi kian kantri ambazip engöra mewöyök kondel engimakza. Injini urunini melejda ölop nembuk mohotje kötumötuetñangö Buñani dop mohot memba malje. Urunini Anutubuk jöhöba mohotje Kraistkö ölni aka nembuk kambu mohot kinjin.

⁷Yangö kukösumñan mönö nöngö uruni sölölohöiga uruni melejbiga Anutunönj kalem möriamni söngörönji qahö niñgiyök. Mi niñgiiga köna asuhuiga Ölöwak Buñagö nup meme azia ahal. ⁸Nöñön Anutugö könagesö sarakñi pakpak engö nembö bapñine eretñi kötökñi maljal. Mewö maljalmö, Anutunönj töndup kalemni öngöngöñi kewöni niñgiyök: Nöñön Kraistkö oyaenjkoyaen Buñani mi kian kantri ambazip engöra jim asarimamgö simbawonj mötzal. Oyaenjkoyaen miangö könani mi körek esiba möt kutum teköbinangö dop qahö.

⁹Anutunönj möpñangö möpñe yuai pakpak miwikñaiBa Buñani tölapñi közamböriga ambazipnönj mala kota malgetka nalö miangörej tönpin malget. Miangöra nöñön Anutugö Buñareñ tölapñi mi galöm köla malbiga ölnambuk ahakza. Nöñön miangö könani aukñe jibiga ambazip körekñan möt sölöngömegöra simbawonj mötzal.

¹⁰Anutunönj mötkutukutuñi qainñi kun könani könani indel neñgiiga nalö kewöñe urumeleñ zioz kambu sutnine eraum möringa aukñe ahum sehimakza. Anutunönj urusihimñan kewö mörakza: Bem suahö galöm aka pom garata öngöngöñi eretñi Suep gölme sutñire öroyuai pakpak galöm kölakzei, yeñön mewöyök Anutugö mötkutukutuñi mi kezap ala mötmegöra mörakza. ¹¹Yeñön mi mötmegöra Anutunönj Buñareñi mi möpñangö möpñeyök nalö qahöpñe uruñan jim köhöiba ali ahöyök. Miangö dop Kembunini Kraist Jisös melaiiga ölni miwikñaiiga könagesöurupñi aka mindiriba kinjin.

¹²Kraistpuk qekötahöba kinda möt narim wañgiinga Anutugö nanğunan mewö taliga ölop yangö jemesoholje anğotpingöra awösamkakak kinjin. ¹³Miangöra kewö ulet engizal: Nöñön kösö mire tata eñön ölöwaknegöra aka köñjiliñ möta malakzali, miangöra uruñinan mönö kude etma. Injini nöngö sihimböloni miangöra aka ölop aködamunñinambuk akñe. Mewö.

Polnönj Efesus yeñgöra kewö köuluköyök:

¹⁴Könani miangöra nöñön Iwinini simin köl wañgiba köulukömakzal. ¹⁵Yangönök mönö iwinini mutukñi akza. Yangö dop Suep aka gölmegegö könagesö pakpak neñön iwi qet memba qerakzin. ¹⁶Kewö köulukömakzal, “Anutu, gi mönö Uñagi Törönji al enginönğa uruñinan köhöimakña. Göhö Buñagi kukösumñi buñabuñañambuk mi teteköñi qahö köwege ahözawi, gi mönö kukösumgi miangö dop mem köhöim engimakñan. ¹⁷Mem köhöim enginönğa ölop Kraist möt narim

wanjigetka uruņine dumņi memba malma. Mewö maliga kesötņini Kraistkö urukalemnöņ möndömğöba mendawölget geiga töndangöba kinme.

¹⁸Urukalemņan nam köl enņiiga könagesö sarakņi pakpak yembuk ölop Kraistkö urukalemņanğö könanņi möt kutume. Jöpaköm neņgimakzawi, urukalem miangö dopņi kewö: Göraņi likepliket teteköņi qahö an bibihiza. Köröpņi enduyangö enduņe angaiza. Köröpņi euyangö euņe öngöza. Mewöyök dutņe emuyangö emuņe geba ahöza. ¹⁹Kraistkö urukalemņan mönö gölmegö mötmötninaņğö dopņi oņgitza. Mi möt kömumegöra kewö köulukömakzal: Anutu, gi mönö aködamunņi pakpakö dop mötmöt Buņagan uruņini kokolak qeba musulungöm enņiman.”

²⁰Anutu mewö köuluköba kewögöra möpöseimakzal: Nini mötmötnini oņgita yuaigöra köuluköba qesibinak me jemeleņ imut ala mötmöribinak ewö, yaņön mönö yuai mi ölop köhöiba neņgima. Anutu kukösumņan uruņine nup memakzawi, yaņön mönö miangö dop köuluk aka mötmöt dopņini oņgit teköba amqeba yuai pakpak ölop ak neņgimakņa. Miangöra möpöseim wanņimakin. ²¹Urumeleņ könagesö neņön tokoba Kraist Jisösgöra aka Anutugö qetbuņanņi möpöseininga aködamunņambuk aka ahöma. Mi gwöt isik ahöm köhöiba teteköņi qahö ahöba öngömei, nalö miangöreņ mönö mewöņanök aködamunņambuk aka ahöma. Keu mi ölja.

Kraistnöņ mindirim neņgiiga ölni mohot akzin.

4 ¹Nöņön Kembubuk qekötahöba kinda nupņi mealangöra kösö miri azia akzal. Keu mi jim teköba uruņini keu kewö jiba kuņğuzal: Anutunöņ ahakmeme aködamunņambuk aka memba malmegöra enņgoholöhi, miangö dop iņini mönö malmal qainņi kun malme.

²^kMöno uruņini memba et ala keu bapņe anda guņbönjönjön qakņe ambazip ak enņgiba malme. Lömböt mökösoņđa malme. Möno lolongöba bölöņanğö kitipņi kude mememö, qaqaenņgiba jöpaköm anğuba malme.

³Uņa Töröņan uruņini qezaköba luaigö kösönöņ jöhöba mindirim enņgimakzawi, iņini mönö uru jöhöjöhö mi sutņine ahömapköra kapaņ köla kinme.

⁴Anutunöņ enņgoholöhi, miangöreņ mönö öröröņ oyaenņkoyaenņ akingö jörömqörömqöni mohot miyök al enņiiga al mamböta malje. Miangö dop iņini mewöņanök Kraistkö öl kemaņi mohot aketka Uņa Töröņi mohotnöņ mönö inahöm enņiiga malme. ⁵Kembunini mohotnöņ galöm köl enņiiga öröröņ möt narim wanņigetka o melun mohot miyöhök mem enņigetka mohot aka malje. ⁶Anutunini mohotnöņ körek iwi ak neņgimakza. Yaņön yuai pakpak körek neņgoņgita Kembu öngöğöņi

^k 4.2 Kol 3.12-13

ak neŋgimakza. Mewö aka jitŋi tem kölbिंगöra körek kuŋguba inahöm neŋgiba urunini dop malmal tatat ak neŋgimakza.

⁷Miaŋgö dop öröröŋ Kraistkö ölni mohot maljinmö, Kraistnöŋ kalem möriamŋi mokoba sihimŋaŋgö dop neŋgiyök. Nup memegö mötmöt kalem könani könani mi mohot mohot neŋgöra dopnine mendeŋ neŋgiiga maljin. ⁸Miaŋgö keuŋi mi kewö jigetka Buŋa Kimbinöŋ ahöza,
 “Yaŋön euyaŋgöreŋ öŋgöba kinda kösö ambazip gwötpuk
 eŋgömeiga buŋaurupŋi aketka kalemŋi kalemŋi mi ambazip
 neŋgöra neŋgiyök.”

⁹“Euyaŋgöreŋ öŋgöyök,” Anutunöŋ keu mi mönö denöwögöra jiyök? Miaŋgö könani kewö: Kraistnöŋ mutuk Suepnöhök erök. Mönö gölme dutŋe emuyaŋgöreŋ geyök. ¹⁰Eröhi, yaŋön mönö mewöyök lilingöba eu öŋgöyök. Öŋgöba Suep mirigö jakeŋi pakpak eŋgongita qakŋe euyaŋgöreŋ öŋgöba malja. Miaŋgöreŋ mala Suep gölmegegö öroyuaiŋiri pakpak mi ösumŋan kokolak qeba jömuŋ dop köl teköba malja.

¹¹Kraistnöŋ ambazip neŋgöra mötmöt kalemŋi könani könani kewö mendeŋ neŋgiyök: Nupŋi mendeŋ neŋgiiga tosatŋan melaimelai ambazip bohonŋi (apostol) aket. Tosatŋan kezapqetok ambazip (profet) aket. Tosatŋan urukuŋgukuŋgu ambazip (ewanjelis) aket. Tosatŋan lama galöm (pasto) aka kusum neŋgineŋgi böhi qaŋazu aket.

¹²Kraistkö ölni mi urumeleŋ ambazip. Neŋön yeŋgö uruŋini naŋgöinga köhököhöi miwikŋaibingöra nupŋi mewö mendeŋda kuŋgum neŋgiyök. Könagesö sarakŋi neŋön körek urugö nupŋi memingö jöjöröm teköba malbingöra aka mewö inahöm neŋgiyök. ¹³Mewöŋa mewö nup murutŋi murutŋi memba mala Anutu möt nariba könangep Nahönŋi möt yaköm soroköba miaŋgöreŋ qezaköm aŋguba mohot aka kinbin. Anutugö mötmötŋi aka aködamun yuaiŋi pakpak mi mönö körekŋanök Kraistköreŋ ahöza. Neŋön Kraistkö köweŋeyök mötmöt ösumŋi öroinga musulungöm neŋgiiga qarim sehiba köhöiba malinga aködamunŋi köl neŋgi körek asuhui malbin.

¹⁴Toroqeba namande tandök malbinbuköra Kraistnöŋ urunini kuŋguba nanŋi ewö aködamuninambuk akingöra inahöm neŋgimakza. Namande tandök malinga qewöloŋ ambazipnöŋ areŋ i me wai ala möndöba tutuhum neŋgigetka tala et neŋguyöhi, iŋini mönö miaŋgö dop aka laŋ malbepuk. Luhutnöŋ lilikqilik qeiga köwetnöŋ kunduriga sirinöŋ gödöwöröt laŋ waŋgiriga an qem kam qem aka simbiŋsambaŋ ahakza. Miaŋgö dop gölme ambazipnöŋ silenöŋ alal aka unŋi memba tilipmötöm miwikŋaiba ambazip laŋ kusum eŋgigetka jaŋjuŋ ahakze.

¹⁵Miaŋgö dop laŋ kude malmemö, keu ölnanök töp jiba jöpaköm aŋguba malme. Mewö mala Kraistnöŋ nöroŋpini akzawi, kesötŋini mönö

¹ 4.8 Sum 68.18

yanğoreŋ möndömgöget geiga töndangöba yuai pakpak miangöreŋ qarim köhöiba aködamunŋinambuk aka malme. ¹⁶ Kraistnöŋ nöröpnini aka ölni jömuhök galöm köl neŋgiiga ginimuramŋi körekŋan mönö ölnjanğö köna böröŋi mindiriba jöhöm neŋgigetka kutulaŋğömakzin. Ösum mohot mohot ahöm neŋgizawaŋğö dop mönö nupnini memba kötöngöba jöpaköm aŋguinga ölni mianğön köhöiba qarimakza. Mewö.

Asakŋaŋğö ahakmeme dölökŋi aka memba malme.

¹⁷ Mewö akzinaŋğöra nöŋön Kembugö jitŋe memba galöm meme keu kewö jibi möt yaköme: Urumeleŋğö kopa ambazip uru mötmötŋini sohoiga nesak ewö aka öne omani laŋ malakzei, iŋini yeŋğö tandök bölöŋi kude toroqeba aka memba malme. ¹⁸ Urumeleŋğö kopa ambazip yeŋğö urumötmötŋinan söŋauiga Anutubuk malmalgöra siksauk aka sohoze. Mötmöt bölöŋan uruŋini gwözöŋda duhuyöhaŋğöra aka gukmaulem aka tönpin malje. Mianğöra Anutugöreŋ malmal köhöikŋe qahö qekötahömakzemö, nanŋinök laŋ töhön malje. ¹⁹ Galömnini qahö mem aŋgugetka uruŋini gwözöŋ teköiga gamu taŋgeŋ malje. Uruŋini kaiseröŋöhön jöhöba qewöloŋ yuaigöra laŋ söŋgaiba tölöhomakze. Yuai membagan membingö nepaqepalok köpösöŋğömakze.

²⁰ Yeŋön mewö ahakzemö, iŋini Kraistpuk malmalgö könaŋi mi mewö qahö kusum eŋgiget mötket. ²¹ Iŋini keu ölnjanğö Toŋi Jisösbuk qekötahögetka mianğö dop könaŋi kusum eŋgigetka ölni kewö möt yaköget: ²² Mutuk ahakmemeŋini walŋi wuatangögetka sihim kömbönaŋini bölöŋan isimkakalek ak eŋgiiga ayuhum aŋgubingö aket. Köna kusum eŋgiget mötkeri, mianğö dop mönö uruŋini walŋi meteköm gila andö qeme.

²³ Urumötmötŋini mem guliget kölöŋaiba malmegöra köna kusum eŋgiget. ²⁴ Anutunöŋ nini nanŋi kaisöŋgolomŋaŋğö dop sarakŋi aka mal köhöibingöra miwikŋaim neŋgiyök. Uru dölökŋaŋğö malmal solanŋi wuatangöbingöra mönö al neŋgiyök. Mianğöra uru dölökŋi miyöhök mönö bök kölget geiga malme. Köna mi mönö mewö kusum eŋgigetka möt yaköget.

²⁵ Köna mewö ahöiga nini Kraistkö ölni mohot mianğö uruŋe darumun ewö mindiriba ala-ala aka maljin. Mianğöra muney mi mönö meteköm gilget geiga sutŋine keu ölnjanök pakpak eraum möta malme. ²⁶ Tembula kukpiriŋnöŋ akŋe ewö, mönö töndup siŋgisöndok kude akŋe. Irimŋini sehölimawi, keuŋini mi mönö zilaŋ wehön jeŋan qahö teköba geiga jim tekögetka solanima. ²⁷ Mewö Bölöŋaŋğö Toŋan sutŋine kaŋgotpapuköra qeapköba nalö kun kude waŋgiba zilaŋ yakörime.

^m 4.16 Kol 2.19 ⁿ 4.22 Kol 3.9 ^o 4.24 Jen 1.26; Kol 3.10 ^p 4.25 Zek 8.16 ^q 4.26 Sum 4.4

²⁸Kunjan yonḡorö meme malöhi, yañön mewö kunbuk kude akḡa. Mewö qahöpmö, mönö nanḡi böröḡan nup kapaḡ köla memba malma. Nup memba nanḡi nene inapḡi miwikḡaiba ölop amqeba ambazip wanapḡi nanḡöm enḡimakḡa.

²⁹Keu lösö kun jitḡineyök kude etmapmö, keu ambazip uruḡini nanḡöba mem köhöimawi, mönö miyöhök jiba malme. Ambazip keuḡini möta uruḡini ahözawaḡö dop qambaḡöra osizei, mönö miangö dop goro enḡigetka keu nahöḡni möta ölöwakeak. ³⁰Anutunöḡ buḡaurupḡi sohpnini meiga Suepnöḡ öḡöbini, nalö miangöra aiwesökḡi kömbönaḡi mekötahöm enḡiiga uruḡine geba Anutugö muḡgemḡi akza. Miangöra Anutugö muḡgemḡi Uḡa Töröḡi mi mönö wösöbirik kude qem waḡgime.

³¹Iḡini mönö urukömbuk, urukondum aka urusiḡgok pakpak mi qeköba gilget köröwen tatma. Urukönöpnöḡ kude jula enḡohoiga uruḡinan auba yom qeta jim aḡubepuk. Mewöyök andöqeḡe keu töhöreḡ mi kude jime. Aḡöjörak könaḡi könaḡi uruḡini tölöhobapuköra mi mönö körek andö qegetka tikep ahöma. ³²Tikep ahömapmö, ala-ala ak aḡuba mököliba ḡuḡböḡḡöḡ qakḡe ak aḡuba malme. Kraistpuk qekötahögetka Anutunöḡ siḡisöndokḡini mosöta saḡoḡ enḡiyöhi, iḡini mönö miangö dop toroqeba köpösihitḡini mosöt aḡuba malme. Mewö.

Anutugö asakḡe malmal mi kewö:

5 ¹Anutugö wölböt nahönböraturupḡi akzeangöra silikḡini mönö kapaḡ köla Anutunöḡ ahakzawaḡö dop aka wuatangöba malme. ²Kraistnöḡ jöpaköm neḡgiba malmalḡi neḡgöra aka köleḡda mosörök. Jöwöwöl ohogetka köwakḡan öḡgözapma, Anutunöḡ miangö dop Kraist malmalḡangö kalemḡi mi möt aḡön köli wöröḡni umköhöwakḡambuk ewö aka yaḡö jeḡe pukpuköiga söḡgaiyök. Iḡini mönö mewöyök urukalemnöḡ kinda Kraistkö dop jöpaköm aḡuba aka memba malme.

³Serowilin, qewöloḡ aḡöjörakḡambuk könaḡi könaḡi me yuai membagun membingö nepaqepalok (gridi) silikḡi mi Anutugö jeḡe qahö dop kölja. Miangöra Anutugö ambazip sarakḡi akzeangö dop yuai mewöḡaḡö keuḡi kun mi sutḡine kude misiriba jigetka mötme. Saumbaḡ!

⁴Aḡgöḡnahitnöḡ lösö keu imbilöḡloḡambuk aka uruqahö keu sinḡi sinḡi mi kude jime. Miangön uruḡini tölöhoiga qahö dop kölja. Miangöra mi mönö mosöt teköba möpömpösei keu jim sehiba malme.

⁵Keu köḡḡi ki mönö möt kömume: Kunjan serowilin me qewöloḡ aḡöjörakḡambuk me membagun membingö nepaqepalok köpösöḡgömakzawi, yañön mönö Anutugö bemtohoḡi buḡa qem aḡumamḡö osima. Ahakmeme miangön bem muneḡi me tandö lopioḡ

^r 4.32 Kol 3.13 ^s 5.2 Eks 29.18; Sum 40.6

möpöseim engimakzeangö tandökñi akza. Mewö akzawanjon mönö Kraist aka Anutu yetkö bemtohoñ uruñe angotpingö osima.

⁶Anutunöñ siñgisöndok mewöñangöra aka tembula irimsesewölñi qegetal ambazip yeñgö qakñine ali öñgömakza. Miangöra kunñan keu omanñi mewöñi jiba kelök ala tutuhuba tilipköm engibapuk. ⁷Miangöra ambazip mewöñi mönö andö enguba yembuk köisirik kude malme. ⁸Mutuk söñaupuk malgetmö, nalö kewöñe Kembubuk qekötahöba kinda yangö asakñambuk malje. Ahakmemeñini mönö asakñangö buñaya akzeangö dop aka memba malme. ⁹Asakñangö buña akzeangö töhötmöriam öñi mi kewö: Inñini ahakmeme ölöñi wuatangögetka Anutunöñ keuñini jim teköi solanime aka keu öl töhöññanök jiba malme. ¹⁰Wani yuai Kembugö jeñe dop kölmawi, miangö könanñi mönö jaruba kewöta möt asarime.

¹¹Söñaupkö ahakmeme gilipitñi (ambetakñi) aka memakzei, yembuk mönö köisirik kude toroqeba malme. Yeñgö bölöñamñini mi mönö indela asakñe ala jim engime. ¹²Tosatñan siñgisöndok tölapñe ahakzei, mi mönö aukñe jibingö gamuñambuk akapuk. ¹³Anutugö asakñan siñgisöndokñini pakpak mem asariiga könanñamñini öññan mönö aukñeyök asuhuma. ¹⁴Asakñangö Toñan mönö tölapñangö yuaiñi pakpak indeliga asakñe aukñeyök ahöma. Miangöra keu kun kewö jigetka ahöza,

“Gauñ ahözani, gi mönö imbigi mötnöñ.

Mönö köhömuñeyök guliba wahötnöñga Kraistnöñ mem asarim gihima.”

¹⁵Keu miangö dop ahakmemeñini mönö mötkutukutu qakñe aka memba malme. Morop aka töñpin malbepüköra mönö ölöññanök galöm mem anguba malme. ¹⁶Kewöñe nalö bölizawangöra aka urugö nup membingö köna kun ahumawi, nalö mi mönö kude mösöhöba ayuhumemö, ambazip qöhöröñine anda ösöñ qambañ köñ engime. ¹⁷Miangöra uruqahö ewö lañ kude malmemö, Kembugö jitsihitñi mi ölöññanök möt asariba kinme.

¹⁸Wain o köhöikñi namba eñololoñ akepuk. Nanñini imbi-imbi malgetka mötmötñini bölöñan asuhugetka söñaup malmalnöñ titeköba geba ayuhubepuk. Miangöra eñololoñ akepukmö, Uñan Töröñan mönö uruñini kokolak qemañköra kapañ köla kinme. ¹⁹“Mönö Buña keu eraum möta Sumbara (sam), möpömöpösei liñet (omsa) aka urugö liñet tosatñi mi urukönömñinan köla Kembu möpöseimakñe. ²⁰Mewö me mewö asuhuiga miangöra mönö Kembunini Jisös Kraistkö qetñi qeta Iwi Anutu sundan saiwap jim wañgiba malme. Mewö.

Awanöm yeñgö goro qambañ keu

²¹Kraistkö jitñi oñgitpepüköra keñgötñini möta mönö sutñine keu bapñe anan ak anguba malme.

¹ 5.16 Kol 4.5 ² 5.19-20 Kol 3.16-17

22-23^vKraistkö öljı mi urumelej könagesö. Yañön miangö nöröpñi aka Amötqeqe Toñi akza. Miangö dop azinöñ mewöyök anömñangö nöröpñi akza. Miangöra ambi iñini mönö Kembugö keu bapñe anangö dop nanñini apurupñini göda qem eñgiba keuñini bapñe anda malme. 24Urumelej könagesö neñön Kraistkö keu bapñe kinjini, miangö dop ambi eñön mewöyök mönö apurupñinangö keu pakpak wuatangöba malme.

25^wKraistnöñ nanñi könagesöñi jöpaköm neñgiba neñgöra aka malmalñi tököba köleñnöhi, miangö tandök azi eñön mönö mewöyök anömurupñini jöpaköba urukalem ak eñgiba malme. 26Kraistnöñ könagesöñi Buña keuñan tök kutuba ambi buñañi sarakñi akingöra o ewö miangön sañgonđa mösoloñanim neñgiyök. 27Yañön nini ölülp sorok akingöra möta uru sönuetnini mösoloñaniba töwöt boromñi kun qahö akingöra kapañ kölakza. Könagesö sarakñi köpösihitkö keunini qahö akingöra mörakza. Kraistnöñ kaba neñguañgiriga asakmararañe eu añgoringa jihilalomñan neñguiga ambi buñañi ewö nini nanñi jemesoholñe al neñgiiga aködamuninambuk kinbin.

28Azi iñini mewöyök mönö Kraistkö tandökñi mewöñi wuatangöba anömurupñini jöpaköm eñgiba malme. Anömñi jöpakömakzawañön mönö nanñi köyan köl añgumakza. Miangöra nanñini sileñini köyan köl añgumakzeangö tandök mönö anömurupñini köyan köl eñgigetka dop kölma. 29Kunñan kun nanñi sileñi nalö kunöñ kazik qahö ak wañgiyökmö, körek neñön silenini gumohoba köyan kölakzin. Kraistnöñ mewöyök könagesöurupñi nini sileñi ewö keuñan gumohoba köyan köl neñgimakza.

30Urumelej könagesö neñön Kraistkö öljı akzin. Neñön Kraist öljangö törömunñi aka maljin. Miangöra gumohom neñgimakza. 31^xBuña keu kun kewö ahöza, “Miangöra azinöñ mönö iwinamñi etkömosöta anömñambuk qekötahöba yahöt yetköñ silemohot aka malmahot.” 32Keu mi söpsöp keu tölapñi. Mi Kraist aka urumelej könagesö neñgö uru jöhöjöhöninangöra jiba ohozal. Keu areñ miangö könañi mi tölapñi aka dutñi gegeni. 33Mewö akzapmö, eñgöra keu mi kewö jizal: Iñini mohot mohotñan mönö mewöyök anömurupñini nanñini köyan köl añgumakzeangö dop jöpaköm eñgiba malme. Anöm eñön mönö mewöyök apurupñini göda qem eñgiba malme. Mewö.

Nahönbörat aka iwinam yeñgö uru jöhöjöhö

6 1^yNahönbörat eñgöreñ ahakmeme diñdiñi mi kewö: Iñini mönö Kembubuk qekötahöba iwinamyahötñini yetkö jitñiri tem köla wuatangöba malme. 2^zAnutunöñ jöjöpañ keu 1-2-3 miengö teteköñe

^v 5.22 Kol 3.18; 1 Pitö 3.1 ^w 5.25 Kol 3.19; 1 Pitö 3.7 ^x 5.31 Jen 2.24 ^y 6.1 Kol 3.20
^z 6.2-3 Eks 20.12; Dut 5.16; Kol 3.21

töwa likepni neŋgimamgö qahö jii ahözapmö, jöjöpan keu jaŋgö 4 mi töromunŋambuk. Mutuk kewö jiza, “Iwinamyahötiki mönö göda qem etkiba malman.” Keu mi tem kölinga Anutunöŋ töwa likepni neŋgimamgö keuji kewö jöhöi ohoget ahöza, ³“Göda qem etkinöŋga Anutunöŋ töhötmöriam gihiiga toroqeba gölmenöŋ nalö köröpji malman.”

⁴Nahönböratuŋinan irimesewöl akepeköra iwi eŋön mönö urukanjam kude ak eŋgiba malme. Mewö qahöpmö, Kembugö Köna keu tem kölmegöra kusum eŋgiba miangö dop mindiŋgöm eŋgigetka qarime. Mewö.

Welenqeŋe aka galöm yeŋgö qambaŋ keuŋini

⁵“Welenqeŋe iŋini mönö gölme qakŋe galömurupŋini yeŋgö keuŋini Kraistkö keu ewö tem köla jöraŋtauat kude ahakŋe. Keuŋini oŋgitpepeköra sömbuŋini möta jönömŋinambuk undui malme. Urueŋmoŋ kude aka böŋ kinda aka memba malme. ⁶Köŋdowoŋ aketka ambazipnöŋ eŋgek sorimegöra qahöpmö, uruŋini nupnöŋ ala memba Anutuŋö jitsihitji wuatangöba Kraistkö welenqeŋe tandök ahakŋe. ⁷Gölme ambazip welen qem eŋgiba mewö miangöŋ Kembugö welenji qemakzin. Mewö möta nupŋini mönö Kembugö jeŋe dop kölmawaŋgö dop uruölöwakpuk memba malme.

⁸Keu ki mönö mötme: Eŋgö sutŋine tosatŋan nup toŋi malje aka tosatŋan toŋini töwa qahö öne welen qem eŋgiba etqeŋeŋi malje. Mi töndup denike yeŋön nup ölöŋji mi me mi memakzei, Anutunöŋ mönö miangö töwaŋi al eŋgiiga buŋa qem aŋgume. Keu mia mönö mötmöriaba malme.

⁹^bTourup aka welenqeŋe eŋgö Kembuŋini mohot yaŋön Suep mire malja. Yaŋön ambazip tosatŋi qahö eŋgek soriba tosatŋi qahö qepureim eŋgimakzapmö, dop mohotnöŋ kewöta keunini jim teköm neŋgima. Galöm iŋini mi möt kutuzeaŋgöra mönö welenqeŋe alaurupŋini simin titit ölöŋji dop mohot ak eŋgiba örom könöpkönöp memtöröp qemtöröp mosöta malme. Mewö.

Anutuŋö jurujamba jömuŋ memba malme.

¹⁰Kimbini tekömamgö aiga keu kewö ohozal: Iŋini Kembubuk qekötahöba kingetka kukösumji ketaŋan mönö inahöba töngum eŋgiiga köhöimakŋe.

¹¹Bölöŋaŋgö Toŋan silenöŋ alalgö mötmöt areŋ könaŋi könaŋi alakzawi, iŋini mi mesohol köla kin köhöimegöra mönö Anutuŋö wahijamba pakpak memba kölget gem aŋgum teköiga malme.

¹²Nini gölme ambazip sep busuŋinambuk yembuk bim qahö aumakzinmö, bem suahe galöm aka iwiluhut bölöŋi bölöŋi tuarenjoŋ

^a 6.5-8 Kol 3.22-25 ^b 6.9 Dut 10.17; Kol 3.25; 4.1

ak enġibingöra kinjin. Bem suahö galöm bölöŋi Suep gölme sutñire jakömbuak dumñine kinda kembu ahakzei, mönö mi qetal enġimakzin. Mewöyök pom böhi öngöŋgöŋi eretñi sutnine panamangö öme tohongö azi ipñi mala öröyuai pakpak galöm kölakzei, neñön mönö yembuk yarö gilakzin. ¹³Miaŋgöra tuarenjoñ ak enġibingöra mönö Anutugö jurujamba lökñanök memba kölget gem aŋguiga kinme. Mewö kingetka kerökñinan nalö bölöŋe enġubingö gangömakñei, nalö miaŋgöreñ mönö ölop amqeba yarö gila tötal enġime aka yarö mi teköiga ölop miri gölmeñine kanjam köla kinme.

¹⁴Wahijambañini mönö kewö löngöt aŋgume: Keu ölñanök jijigö irimuŋaŋi mönö anjöŋine jöhöba kinme. Ahakmeme solan sorokñi mi töptöpñine göwangöwaŋ (kapa Maluku) ewö köla sel jöhöm aŋguba kinme. ¹⁵Köna esu böñtöñök löngöta ölop töndangöba tiba anakzin. Miaŋgö dop iñini mönö luaigö Buñaŋi jim sehibingö jöjörögetka miañön bohön köl enġima. ¹⁶Jurujamba miembuk toroqeba saiwa bohönñi qetñi mötnarip mi mönö buña qem aŋguba sundan teŋgöba kinakñe. Bölöŋaŋgö Toñaŋ neñgeriba qönsihim neñgimamgöra möta timbi liŋgipñi mulahakzawi, miaŋgö esapesap könöpñi pakpak mönö suman miañön qeapköba aŋgön köl aŋgumakñe.

¹⁷Anutugö Amötqeqe Toñi i mönö buña qem aŋgume. Buña qem aŋguba kunbuk letotmei, dom-amöt miañön mönö nööröpñini ain irikmarik ewö turuba aŋgön köl enġimakña. Uña Töröñaŋ bimgö sou ketañi neñgizawi, mi Anutugöreñ Buña keu. Mi mewöyök mönö buña qem aŋguba urukönömñine ala bimñini miañön qemakñe. ¹⁸Wahöjambañini pakpak mi löngöt aŋguba mönö nalö dop Anutu köuluköba qesiba malme. Uña Töröñaŋ enġuasöta inahöm enġimakzawaŋgö dop mönö uletnöŋ sahöt waŋgimakñe. Mönö pöndaŋ uruguliguli mala sundan Anutugö ambazip sarakñi pakpak yeŋgöra aka kapaŋ köla köulukömakñe.

¹⁹Nöŋgöra mewöyök kewö köulukömakñe, “Anutu, gi mönö keu kötñi diñdiñi Pol waŋginöŋga göhö Ölöwak Buñaŋi tölapñi mi keu jitñaŋ jimawaŋgö dop jim asariba awösamkakahök kinda uru kuŋgum enġimakña.” ²⁰Nöñön Ölöwak Buña miaŋgöra aka Anutugö jitñememe azi bohönñi akzalmö, nupñi memakzalaŋgöra aka nalö kewöŋe kösö mire tatzal. Miaŋgöra Buña keu mi Anutugö jeje dop kölmawaŋgö dop awösamkakahök jiba malmamgöra mönö köuluköba malme. Mewö.

Yaizökök keu teteköŋi

²¹Wölböt alani Tikikus yañön nöŋgö kösohotni alma. Yañön Kembubuk qekötahöba nupñi memburik-qemburikñi qahö memakza. Kiaŋgöreñ

° 6.14 Ais 11.5; 59.17 ° 6.15 Ais 52.7 ° 6.17 Ais 59.17

denöwö aka memba tarakzali, mi pakpak jiiga injini mewöyök mi mötme.
22 Nejön denöwö maljin tatzin, injini kösohot mi mötmegöra Tikikus melaim wangibiga Efesus engören kama. Yanjön kaba urukölalep engiiga ölop bönjöj malme.

23 Iwi Anutu aka Kembu Jisös Kraist yetkön mönö urumelenj alaurup engören lui qeba urukalem ak engiba mötnaripjini mem köhöimakña.
24 Ambazip Kembunini Jisös Kraist nalö teteköjji qahö jöpaköba malmei, Anutugö kalem möriamjan mönö körek embuk ahöba ahöm öngöma. Mewö.